



ERMUKO UDALA
AYUNTAMIENTO DE ERMUA

2. Ordenantza Fiskala Jarduera ekonomikoen gaineko zerga

I. IZAERA ETA ZERGA-EGITATEA

1. ARTIKULUA

1. Ekonomi Jardueren gaineko Zerga zuzeneko zerga erreala da. Bizkaiko Lurralde Historikoan, Ermuko udal mugartean hain zuzen ere, enpresa, lanbide edo arte jarduerak egitea da zerga horren egitatea, besterik gabe, berdin dio jarduerak lokal jakin batean egiten diren edo ez eta zergaren tarifyan zehazturik dauden edo ez.

2. Zerga honen ondoreetarako, enpresa jardueratzat hartzen dira honako zerga arautzen duen 6/1989 Foru Arauan adierazitakoak.

2. ARTIKULUA

1. Jarduera bat enpresa, lanbide edo arte jardueratzat joko da hura egiten duenak bere kabuz antolatu behar ditueneko ekoizpideak eta giza baliabideak edo bietako bat, ondasun edo zerbitzuen ekoizpen edo banaketan jarduteko.

2. Zergapeko jardueren edukia zergaren tarifyetan zehaztuko da.

3. ARTIKULUA

Zergapeko jarduerak egiten direla frogatzeko, zuzenbidean onar daitekeen edozein bide erabiliko da, eta, bereziki, Merkataritza Kodearen 3. artikuluan ezarri diren bideak.

4. ARTIKULUA

Ez dira zerga honen zerga-egitatetzat joko ondorengo jarduera hauek:

1. Enpresen aktibo finkoan sartuta dauden ondasunak besterentzea, baldin eta ondasun horiek, ibilgetu moduan, inbentarioan behar bezala jasota egon badira eskualdaketa burutu baino urte bi lehenagotik, gutxienez; eta saltzailearen erabilera pribaturako diren ondasunak saltzea, baldin eta arestian adierazi den epean erabili baditu.

2. Lan pertsonalen edo lanbide-zerbitzuen ordainetan jasotzen diren ekoizkinak saltzea.

3. Establezimenduaren apaindurarako baino ez diren gaien erakusketa. Aldiz, bezeroei oparitzeko diren gaien erakusketa zergapean egongo da.

4. Txikizkako salmenta denean, ekintza bakarra edo eragiketa soltea egitea.

II. SALBUESPENAK

5. ARTIKULUA

1. Zergatik salbuetsita egongo dira:

a) Estatua, Euskal Autonomia Erkidegoa, Bizkaiko Lurralde Historikoa eta toki-erakundeak, bai eta haien administrazio-organismo autonomoak eta unibertsitate publikoak eta haiei atxikitako ikastetxe publikoak ere.

b) Nazioarteko itunben edo hitzarmenen arabera salbuespena aplikatu behar zaien subjektu pasiboak.

c) Gizarte Segurantzaren erakunde kudeatzaileak eta indarreko legeriaren arabera eratuta dauden mutualitate eta montepioak.

d) Ikerketa-erakunde publikoak eta maila guztietako irakaskuntza-establezimenduak, erabat Estatuaren, Euskal Autonomia Erkidegoaren, Bizkaiko Foru Aldundiaren, toki erakundeen edo ongintza edota herri onurako izendapena duten fundazioen funtsez mantentzen direnak, eta orotariko irakaskuntza-establezimenduak, irabazi-asmorik gabe hezkuntza-itunpean egonik, beren ikasleei liburuak edo idatz-artikuluak edo pentsio erdian zein barnetegi zerbitzuak ematen dizkietenak, nahiz eta salbuespen moduan establezimenduan bertan saldu irakaskuntza tailerretako ekoizkinak, beti ere salmenta horren emaitza lehengaiak erosteko edo establezimenduaren artapenerako erabiltzen denean eta ez duenean norbanako edo gainontzeko batentzako erabilerarik.

e) Urritu fisiko, psikiko edo zentzumenezkoen elkarte edo fundazioak, irabazteko xederik ez dutenean, burutzen duten jarduera pedagogikoa, zientifikoa, laguntzako eta enpleguaren alorrekoa denean eta minusbaliatuen irakaskuntza, hezkuntza, birgaikuntza eta babesa eskuratzeko direnean, nahiz eta helburu horietarako dituzten lantegietan ekoizten diren ekoizkinak saldu, beti ere salmenta horren emaitza lehengaiak erosteko edo establezimenduaren artapenerako erabiltzen denean eta ez duenean norbanako edo gainontzeko batentzako erabilerarik.

f) Gurutze Gorria eta arauz zehazten diren antzeko beste erakundeak.

g) Zerga honen indarraldiko lehenengo bi zergaldietan jarduerari ekiten dioten subjektu pasiboak.

Ondore horietarako, jarduera bat ez da hasitzat emango ondorengo kasuetan:

- Jarduera hori aurretik beste titulartasun batekin burutu denean. Halan gertatuko da jarduera-adarrak batu, bereizi eta gehitzen direnean.

- Merkataritza Kodearen 42. artikuluaaren arabera, subjektu pasiboa elkarte-talde bateko kide denean, jarduera berria denean salbu, taldea osatzen duen ezein enpresa lehenago aritu gabea.

- 100eko 25 baino gehiago jarduera bera egiten ari diren enpresek partaidetza dutenean.



ERMUKO UDALA
AYUNTAMIENTO DE ERMUA

2. Ordenantza Fiskala Jarduera ekonomikoen gaineko zerga

Aurreko zenbakietan ezarritako kasuetarako jarduera bera burutu delakotzat emango da berori zergaren tarifetan talde berean sailkatuta dagoenean

h)Zergaren Foru Arauan ezarritako baldintzen arabera, eragiketa bolumena 2.000.000 eurotik beherakoa duten subjektu pasiboak.

2. Aurreko idatz-zatiko d) eta e) letretan araupetu diren onurak eskatu egin beharko dira eta, bidezkoa denean, alderdiak eskatu ondoren emango dira.

III. SUBJEKTU PASIBOA

6. ARTIKULUA

Zerga honen subjektu pasiboak dira pertsona fisikoak eta juridikoak eta Bizkaiko Zergei buruzko Foru Arau Orokorraren 34. artikuluan adierazitako erakundeak, baldin eta zerga-egitatea sortzen duten jardueretariko baten bat egiten badute Bizkaiko Lurralde Historikoan, hain zuzen ere Ermuko udal mugartean.

IV. ZERGA KUOTA

7. ARTIKULUA

Zerga-kuota izango da tarifak, zergaren Foru Arauan eta berau osatu eta garatzen duten xedapenetan adierazitakoaren arabera eta, behar denean, honako ordenantza fiskal honetan araututako koefizienteak, indizea eta hobariak aplikatuz sortzen den emaitza.

8. ARTIKULUA

Zergaren tarifetan gutxieneko kuotak ezarriko dira eta horiek aplikatzeko jarraibideak emango dira. Zergaren tarifak araugintzako foru dekretu bidez onetsiko dira. Gutxieneko kuotak finkatzeko oinarriak honakoak izango dira:

1. Zergapeko jardueren edukiaren mugaketa, sektore ekonomikoen ezaugarrien arabera. Oro har, zergaren sortzapen unean gertatu beharreko elementu finkoen bidez tipifikatuko dira zergapeko jarduerak.

2. Zergapeko jarduerak sailkatzeko epigrafe eta idazpuruak, ahal dela, Ekonomi Jardueren Nazio Sailkapenaren arabera ordenatuko dira.

3. Euren etekin ekonomiko urriagatik zero kuota ezartzen zaien jardueren edo jarduera-modalitateen zehaztapena.

4. Tarifak aplikatuta ateratzen diren kuotak, gehienez ere, zergapeko jarduerak ustez ematen duen batez besteko etekinaren %15 izan daitezke. Kuotak finkatzerakoan, aurreko Lehen oinarrian adierazitakoaz gainera, kontuan hartuko da zergapeko jarduerak egiteko erabiltzen diren lokalen azalera.

5. Zergaren tarifetan, halaber, Bizkaiko Lurralde Historiko osoan jarduteko gaitasuna ematen duten kuotak finkatu ahal izango dira. Hori egiten denean, horrelako kuoten arabera zerga ordaindu ahal izateko baldintzak eta kuoten zenbatekoa adieraziko dira, dena-delako jardueraren leku-eremua kontuan izanik.

9. ARTIKULUA

Bizkaiko Lurralde Historikoko Aurrekontu Orokorrei buruzko foru arauetan zerga honen tarifak aldarazi ahal izango dira eta eurretan dauden kuotak eguneratu.

10. ARTIKULUA

1. Zergaren tarifetan ezarritako gutxieneko kuotak, subjektu pasiboak dituen eragiketa bolumenaren arabera haztaperen koefizienteak aplikatuz gehituko dira. Koefizienteak kalkulatzeko honako taula hau erabiliko da:

Eragiketa bolumena	Koefizienteak
2.000.000,00 eta 6.000.000,00 bitartekoa	1,20
6.000.000,01 eta 10.000.000,00 bitartekoa	1,22
6.000.000,01 eta 10.000.000,00 bitartekoa	1,24
50.000.000,01 eta 100.000.000,00 bitartekoa	1,27
100.000.000,01etik gorakoa	1,30
Eragiketa bolumenik ez	1,25

2. Behin aurreko idatz-zatian adierazitako koefizienteak aplikatuta ateratzen diren kuotak, Ermuko udal mugartean ekindako jarduera guztientzako berdina den koefizienteak aplikatuz gehituko dira; 2,18ko koefizienteak, alegia.

11. ARTIKULUA

Aurreko artikuluan adierazitako koefizienteak aplikatuz gehitutako kuotetan, establezimendua udalerrian dagoen tokiaren arabera aplikatuko diren indizeen taula hau ezarri du Ermua Hiriko Udalak:

1. kategoriako kalea	1,6
----------------------	-----



ERMUKO UDALA
AYUNTAMIENTO DE ERMUA

2. Ordenantza Fiskala Jarduera ekonomikoen gaineko zerga

2. kategoriako kalea	1,4
3. kategoriako kalea	1,3

V. ZERGALDIA ETA SORTZAPENA

12. ARTIKULUA

1. Zergaldia egutegiko urtea izango da, alta aitortpenak direnean izan ezik; hala denean, jarduera hasten denetik egutegiko urtea bukatu artekoa izango da zergaldia, artikuluko honen 3. idatz-zatia ezarritakoaren kalterik gabe.

2. Zergaldiko lehen egunean sortuko da zerga, eta kuotak ezin izango dira txikitu, salbu eta, alta aitortpenen kasuetan, jardueraren hasierako eguna egutegiko urtearen lehen eguna ez denean, horrelakoetan kuotak urtea amaitzeko egutegiko urtetik falta diren hiru hilekoen, jarduera hasi den hiru hilekoa barne, kopuruaren arabera, proportzionalki, kalkulatuko dira eta.

Halaber, eta jarduerari baja ematen zaionean, kuotak hiru hileko naturaletan hainbanatu ahal izango dira, jarduerari utzi zaion hiru hilekoa barne.

3. Ikuskizunak direnean, kuotak emanaldi solteen arabera ezarrita badaude, emanaldiren bat egiten den bakoitzean gertatuko da zergaren sortzapena, eta aitortpenak arau bidez ezarritako eran aurkeztu beharko dira.

VI. KUDEAKETA

13. ARTIKULUA

1. Zergaren kudeaketa matrikula egiten denean hasiko da. Matrikula hori urtero egingo da eta zentsuez osatuko da; zentsu horietan ekonomi jarduerak, subjektu pasiboak, zerga zorrak eta, halakorik egonez gero, foru errekgaria jasoko dira. Matrikula jendearen eskueran egongo da udaletxean.

2. Subjektu pasiboek aitortpenak aurkeztu beharko dituzte zerga honen matrikulan, arau bidez ezartzen diren epeetan eta moduan.

Subjektu pasiboek, halaber, zergapean dauden jardueretan gertatutako aldakuntza fisiko, ekonomiko eta juridiko guztien berri eman beharko dute, baldin eta zerga honen ordainketan ondorioz badute, eta arau bidez ezartzen diren epeetan eta moduan egin beharko dute jakinarazpen hori.

3. Zerga ikuskatzaileen jarduketak, altak edo zergadunek egindako jakinarazpenak direla-eta zentsuetan datuak sartu, kendu edo aldatzen direnean, egintza hori administrazio-egintzatzat joko da eta zentsuaren aldarazpena ekarriko du. Matrikulan aldaketarik egin ahal izateko, zentsuetan

dauden datuak ukitu behar badira, lehenengo eta behin zentsuetan egin beharko da aldaketa hori, nahitaez.

14. ARTIKULUA

1. Zerga ordainarazi, kudeatu, likidatu, ikuskatu eta biltzeko ahalmenak, bai borondatezko aldian bai premiamendu bidean, zergapeko jarduerak egiten diren udalerriko Udalari dagozkio.

2. Udal honen eskumeneko eginkizunak dira matrikula jendaurrean azaltzea, errekurso eta erreklamazioak ebaztea, zerga kobratzea, salbuespen eta hobariak aplikatzea eta zerga honekin zerikusia duten gaietan zergadunei laguntza eta informazioa ematea.

3. Foru Aldundiaren egitekoak dira matrikula osatu eta artatzea, jarduera ekonomikoak kalifikatzea eta kuotak ezartzea.

Hala ere, Foru Aldundiak nahiz udalek egin ditzakete egintza horien jakinarazpenak, bai eta zerga zorrak zehazteko likidazioen jakinarazpenak ere.

4. Udalaren ardura da ordainagiriak egitea, baina horrek ez du ezertan eragotziko Toki Ogasunei buruzko abenduaren 16ko 2005/9 Foru Arauaren 8. artikuluan azaltzen diren lankidetzarako bideak erabiltzea.

Udala eta Aldundia lankidetzan arituko dira zergaren matrikula osatzeko eta artatzeko; halaber, batera jardungo dute jarduera ekonomikoak kalifikatzeko eta kuotak ezartzeko orduan.

5. Salbuespenak eman edo ukatu aurretik beti eskatu beharko da Foru Aldundiaren txosten teknikoa, eta horri buruz hartzen den erabakiaren berri jakinarazi beharko zaio Foru Aldundiari.

15. ARTIKULUA

Jarduerak kalifikatu eta kuotak ezartzeko egintzen aurka jartzen diren errekurso eta erreklamazioak direla-eta, aginduzkoa izango da Bizkaiko Zergei buruzko Foru Arau Orokorraren 156-168 bitarteko artikuluetan xedatutakoa, eta Bizkaiko Foru Aldundiak izango du eskumena errekurso eta erreklamazioak ebazteko. Errekurtso edo erreklamazioa jarrita ere egintzaren betearazpena ez da etengo.

16. ARTIKULUA

1. Udal honi dagozkion matrikulak Foru Aldundiak egingo ditu eta Udalari igorriko dizkio.

2. Behin matrikula jaso eta gero, Udalak jendaurrean azalduko du 15 egunez, ukitutako zergadunek aztertu ahal izan dezaten eta bidezko deritzeten erreklamazioak egin ahal izan ditzaten.

17. ARTIKULUA

1. Jendaurreko azalpen epea amaitu eta erreklamazioak ebatzi ondoren, emaitzaren ziurtagiria Foru Aldundiari igorriko zaio onetsi dezan.



ERMUKO UDALA
AYUNTAMIENTO DE ERMUA

2. Ordenantza Fiskala Jarduera ekonomikoen gaineko zerga

2. Behin onetsita, Udalak ordainagiriak egingo ditu, Toki Ogasunei buruzko abenduaren 16ko 2005/9 Foru Arauaren 8. artikuluan azaltzen diren lankidetzarako bideen kalterik gabe.

VII. AZKEN XEDAPENA

Ekonomi Jardueren gaineko Zerga araupetu duen zerga ordenantza honek 2026ko urtarrilaren 1etik aurrera izango du indarra, behin betiko onetsi eta Bizkaiko Aldizkari Ofizialean 2025eko abenduaren 31ko 249. alean argitaratu eta gero, eta indarrean iraungo du harik eta hura aldarazi edo indargabetzea erabakitzen den arte.